

Na osnovu člana 40. stav 2. tačka 4. Zakona o ličnoj karti državljana Bosne i Hercegovine ("Službeni glasnik BiH", broj 32/01) i Zakona o izmjenama i dopunama Zakona o ličnoj karti državljana Bosne i Hercegovine ("Službeni glasnik BiH", broj 16/02), Ministarstvo civilnih poslova i komunikacija Bosne i Hercegovine, donosi

# **PRAVILNIK**

## **O VRŠENJU NADZORA NAD PROVOĐENJEM ZAKONA O LIČNOJ KARTI DRŽAVLJANA BOSNE I HERCEGOVINE**

### **Član 1.**

Ovim pravilnikom propisuje se način vršenja nadzora nad provođenjem Zakona o ličnoj karti državljana Bosne i Hercegovine (u daljem tekstu: Zakon).

### **Član 2.**

Nadzor nad provođenjem Zakona vrši Ministarstvo civilnih poslova i komunikacija Bosne i Hercegovine, Ministarstvo unutrašnjih poslova Republike Srpske, ministarstva unutrašnjih poslova kantona u Federaciji Bosne i Hercegovine i nadležni organ Brčko Distrikta Bosne i Hercegovine, na način utvrđen ovim pravilnikom.

### **Član 3.**

Nadzor iz člana 2. ovog pravilnika vrši lice koje pismeno ovlasti ministar civilnih poslova i komunikacija Bosne i Hercegovine.

Nadzor u okviru nadležnosti organa u entitetima vrše lica ministarstava unutrašnjih poslova koje pismeno ovlasti rukovodilac koji rukovodi nadležnim ministarstvom.

Nadzor u okviru nadležnosti organa Brčko Distrikta Bosne i Hercegovine vrši lice koje pismeno ovlasti rukovodilac koji rukovodi tim organom.

### **Član 4.**

Lice iz člana 3. stav 1. ovog pravilnika nadzor vrši tako što kontroliše zakonitost upravnih akata i radnji odnosno kontroliše primjenu Zakona i podzakonskih akata i s tim u vezi predlaže MCPK-a BiH da u okviru svojih nadležnosti ovo ministarstvo pokrene postupak ocjene zakonitosti upravnih akata, donese odgovarajuća uputstva i instrukcije i naloži preduzimanje određenih mjera i radnji u otklanjanju uočenih nedostataka.

### **Član 5.**

Lica iz člana 3. st. 2. i 3. ovog pravilnika vrše nadzor i kontrolu rada nadležnih organa iz člana 5. Zakona o ličnoj karti državljana Bosne i Hercegovine i podzakonskih akata iz ove oblasti.

#### Član 6.

Ovlaštena lica iz člana 3. Pravilnika zapisnik o izvršenom nadzoru, dostavljaju rukovodiocu organa kod kojeg je nadzor izvršen.

Ovlaštena lica iz prethodnog stava primjerak zapisnika sa predloženim mjerama dostavljaju rukovodiocima organa iz člana 2. Pravilnika radi upoznavanja sa zatečenim stanjem u cilju preduzimanja određenih mjera.

#### Član 7.

Ovaj pravilnik stupa na snagu danom objavljivanja u "Službenom glasniku BiH".

Ovaj pravilnik će se objaviti i u službenim glasilima entiteta i Brčko Distrikta BiH.

---

Broj 01/1-1296/02 2. decembra 2002. godine Sarajevo

---

Ministar Svetozar Mihajlović, s. r.